

摘藻堂四庫全書薈要

集部

欽定四庫全書薈要

集部

明詩綜卷五十八

詳校官編修臣汪鏞



欽定四庫全書薈要卷二萬五百三十一

集部

明詩綜卷五十八

翰林院檢討朱彝尊編

懋學 三首

懋學字君典宣城人萬厯丁丑賜進士第一授

翰林修撰追謚文節有郊居遺稿

王元美云先生詩文不名

一家縱橫捭闔
往往出人意表

靜志居詩話君典少任俠無精技勇能上馬舞
丈八稍嘗出塞縱觀飛狐花馬險塞突為曠騎

追至幕南君典挾一矢命中其黨乃不敢追既
登狀頭是年第二人即江陵相君子嗣修江陵
方欲引以相助會奪情之舉君典貽書嗣修謂
相君天子師表奈何棄網常飽人以口實嗣修
惡不能答也又貽書李尚書養河辭頗激切養
河發書嘻笑而已君典迺與吳編修子道趙檢
討汝師謀各上疏吳趙受杖去官而君典疏草
為人所持不果進然江陵業恨其異已而海內
皆服其風節矣君典四十而夭年壽不將命爾
而王元美作墓表屠緯真作傳欲傳會曇陽子
昇真之確至以妖夢厚誣光明磊
落之君典是豈愛人以德者邪

次別曾直卿太史

年來多病檢方書夢入雙溪把釣餘
賈誼豈能收涕淚

嵇康元自愧麤疎翻愁草色春將晚却笑桃花錦不如
戀別可堪風雨夕江天搔首坐躊躇

署中聞子規

一片愁心託杜鵑望中隴樹斷蒼烟歸人只是歸難得
白髮相催又隔年

贈沈孟嘉訪開之湖上

初陽臺上紫雲停何處瑯簫入夜聽載酒看花歌白紵
直教明月下西泠

曾朝節一首

朝節字直卿臨武人萬厯丁丑賜進士第三授
編修歷侍講諭德進侍讀學士少詹事升南禮部
右侍郎掌翰林院終禮部尚書謚文恪有紫園草

方正學祠

祠堂開木末宛在闕庭前緣經舊君服離騷絕命篇已
知心匪石膏汙筆如椽瓜蔓抄雖毒遺文百世傳

馮

琦七首

琦字用韞臨朐人萬厯丁丑進士改庶吉士授

編修歷侍講右諭德左庶子少詹事升吏部侍

郎卒贈禮部尚書謚文敏有北海集

陳卧子云
宗伯經術

之士其詩雖未
冥搜亦能象合

結交行呈楊公亮時公亮止酒

寒不作堂上燕饑不作韝上鷹韝上威稜豈不峻一飽
即掣非人情親極難為疎貴極難為賤長平未罷賓客
去何必貴賤交情見君不見步兵厨君不見濬冲壚長

安車馬夾道趨雲雨翻覆無時無君今不醉胡為乎

送伯楨侍御之川中憲副

間何闊逢諸葛行且止避御史御史今年三十歲鷹繡
翩翩帶金紫聖主真憂萬里外使君建節三巴裡刑天
舞干亦自豪精衛填海空復勞黃河懸水三十仞呼風
亂度難容舠嗟嗟王郎汝何往古來得失如反掌長安
大路多摧輪況乃蜀道青冥上蜀道之難難於天不如
歸問桑麻田振衣獨上三峰巔塵埃野馬何茫然君不

見鴈門菟郡伊與鹿南陽畫諾亦見逐世間萬事誰能
卜汝為遠臣恩已足

邢太保破倭功成以大司馬筦留鑰過家省覲太
夫人

雲霄漢闕頒新命豐鎬周京奠舊邦九列獨高蒼玉佩
六師爭擁碧油幢橫戈絕域春浮海擊楫中流夜渡江
聖主憂先根本計留侯籌策況無雙

恭陪聖駕步禱南郊紀盛

龍武新軍罷勾陳御路開紅塵都不埽留待雨師來

題萬玉山房

本是瀟湘人最愛瀟湘竹何處丘中琴歷歷瀟湘曲

題關氏畫像

紅妝一隊陰山下亂點酡酥醉朔野塞外爭傳孃子軍
邊頭不牧烏孫馬

送魏懋忠

擊筑高歌興未孤暫分離恨作歡娛不知後夜相思夢

得及今朝醉裏無

余繼登

三首

繼登字世用號雲衢交河人萬厯丁丑進士改庶吉士授檢討累官禮部尚書贈太子少保謚文恪有澹然軒集

詩話文恪古詩指陳時事鏗奇磊落卓然名家其在容臺值國儲未建災變頻仍雷擊太廟樹南都火太白經天秦晉齊皆地震西寧鐘不扣自鳴紹興地出血公俱直言無諱先公冊封周藩公詩惟以旱暵為憂不失古人贈言之義聞公先是使周藩渡河舟膠柁折公告于神曰使

臣縱有罪神敢震驚龍節亦有佚罰維神實圖利之禱畢而波恬若有翼舟以濟者斯亦異矣

送朱太史養淳冊封周藩

昔予祇行役驅車向中原中原饑饉餘氛祲日以煩白骨
亂如麻黯然消神魂朱門鬱蕭條哀哀諸王孫君今復持
節翩翩過夷門不知周子遺今有幾家存況今旱為虐五
月黃塵昏知君負經濟雅志念黎元當其授簡時應為廢
朝餐莫以董賈筆虛負鄒枚言願賡雲漢篇歸來達至尊
送張伯任都諫閱邊

開城古雍州漢家朝那地迢迢控諸番可以斷右臂一
從和議成關門久不閉無復念軍興祇聞增歲幣壯士
卧干戈邊城罷烽燧豈不息戰爭詎可消兵器藩籬不
復施豺狼日窺伺去年戎馬來三軍同日斃所過無雞
豚哀哉肆吞噬天子頻西顧疆吏盡更置君從掖垣中
叩闥數言事聚米悉邊情一一當上意藉爾青瑣賢出
作行邊使周覽昔戰場白骨尚委棄四野無人烟那能
不隕涕誓將廓垢氛何以壯軍勢君其賈餘勇時方待

高議好上金城略永垂秦川利甘學汲公慙寧顧漢庭
忌得君借前籌庶同指掌易

放歌

余雲衢汝亦堂堂七尺軀二十脫穎薦鄉書三十挾策
計吏俱玉堂金馬此何地容汝久玷承明廬從汝執經
已三載天子不肯臨石渠吁嗟乎汝既無封侯骨拜相
鬚謾言虎可繡龍可屠屠龍繡虎竟何益况汝冥頑一
技無汝不見轅下駒一旦受君牧與芻為君萬里爭馳

驅少府金錢等膏血太倉粟米煩徵輸念汝何功敢竊
食十二年費官家儲去夏一病幾長徂汝今不去將安
需衛河之許茅可誅且營菟裘為汝居貴何須誇趙孟
富何須羨陶朱從今且自脫樊筓三家市裡逡巡酒五
畝園中轂觥車免使微名挂朝簿耕田鑿井歌唐虞

鄒元標二首

元標字爾瞻吉水人萬厯丁丑進士觀政日以
建言謫戍召授吏科給事中復以言事降南刑

部照磨升南兵部主事改吏部歷員外郎中罷
起大理寺卿升刑部右侍郎終都察院左都御
史贈太子太保吏部尚書諡忠介有存真集

詩話先生晚總西臺入朝而躋御史前糾失儀
先文恪公進言曰元標在先朝直言受杖至今
餘痛未除也德陵意解此
事實錄不載附識於此

簡羅公廓給諫

老去交情重懷君意轉深廿年青瑣客同賦白頭吟突
兀千秋意蹉跎萬古心嚶嚶聞好鳥相喚出幽林

送俞定所起大名

久別相看慰所思
送君空有淚臨歧
黃沙白草無窮恨
不獨尊前感別離

陸可教

三首

可教字敬承
蘭谿人
萬歷丁丑進士
改庶吉士
除編修
歷官南京禮部右侍郎
有學士遺橐

吳宮引

姑蘇臺前鳥飛絕
西施醉舞吳宮月
纖袿長袖香不歇

銀燭金釭半明滅
羅帳流蘇四垂結
銅壺丁丁漏水咽
伍胥大夫雙胥裂

春日郊游

出郊時駐馬
物色澹春陰
偶爾耽幽賞
因之愜素心
人家隔水見
僧院入花深
似覺仙源近
迷津未可尋

陶山幽棲寺

萬山迴合隱招提
聞說鷗夷舊此棲
三策早知能霸越
千金何意復居齊
人尋古洞穿雲入
木落層巖聽鳥啼

欲向山僧論往事五湖烟櫂至今迷

楊起元一首

起元字貞復歸善人萬厯丁丑進士改庶吉士
除編修累官吏部右侍郎兼翰林院侍讀學士
謚文毅有家藏集

送黃雲崖宿州掌教

前月乘輜車經過睢陽驛慨然思古人入城訪遺跡西
去二百里張許今廟食秉彝在人心誰不好懿德君今

涉淮流傳經聚逢掖文藝何足云忠孝為標的國家根本
本地士風最當植丈夫萬世名勉之在一息

嚴一鵬二首

一鵬字汝化無錫人萬厯丁丑進士除行人以
貴州道御史按廣西以浙江道御史按浙江以
福建道御史按山東歷官刑部左侍郎贈尚書
有二知軒詩藁

詩話尚書達尊居三特賜存問賦詩雖不多調
故清徽有長孫福孫最善易著易通義頗發先

儒所未發惜未刊行其次中允繩孫也
尚書彙流傳者寡從中允所抄得之

吏隱齋懷孫龍涵

分袂愁何限開函喜不禁三年羈旅思千里故人心日
落梁溪暮花殘魯地陰天台如有賦雙鯉莫浮沉

清明日賈宏庵樓隱園社集

春風吹拂柳絲斜佳節相攜感物華共有錦囊題白雪
未須金管勸流霞人行磴道初如蟻日落湖帆盡載花
散步踏芳歸任晚城南猶有未栖鴉

馮夢禎 十一首

夢禎字開之秀水人萬厯丁丑進士改庶吉士
除編修終南京國子祭酒有快雪堂集

詩話馮公儒雅風流名高三席歸田之後間娛
情聲伎箏歌酒讌望者目為神仙中人詩亦不
蹈時習五古能盤硬語尤見意匠經
營同譜若沈君典屠緯真皆不及也

結交篇 有序

余少時友周生彥雲嗣交賀生伯闇庚午癸酉
余與彥雲相繼登鄉薦丁丑余以南宮舉首官

翰林中遭廢棄壬辰出山赴南司業癸巳擢掌
南翰其明年甲午伯闇始舉于順天乙未成進
士官行人而彥雲猶未釋公車功名之遲速變
幻如此今年丁酉秋余為南祭酒幾二年所而
彥雲自里中見訪時余苦疴方上乞骸之疏會
有詔使臨則伯闇也我三人廿年中離合不知
凡幾忽有此晤喜不自勝遂成此篇

憶年十五六眼空心膽麤三人笑相暱意氣凌萬夫轉

蓬三十年飛沉不同途賀子初牽紱周生尚公車劣余
最先達典胄山水都撫疾新乞骸逐疴猶向隅明主有
餘戀故人不我疎賀子忽持節周生未返廬三人共形
影嘉會在須臾升沉豈有常離合難可拘努力崇德音
皓首願無虛

仲春湖上登覽與叔宗同賦

春至嘉卉榮氣和長薄絢遵渚洽淪漣升堤媚蔥蒨遠
近生態殊昏旦物候變高下柳盡舒參差桃始炫鳴禽

選秀木時女步芳甸朋儔或回睇舟陸諧所便勝情欣
有託日夕遺深眷

題東山許氏小樓

為樓枕東山山翠常滿樓非徒自怡悅亦以娛朋儔壁
月當綺牕白雲漾丹丘我來秋色晚不惜十年留南壩
如可闢蕪得狎野鷗

若下

夙昔眷幽溪于今凌漭漭引艇及朝曦滌洄淹夕漲乍

進離煩躡少馬益蕭曠岸仄交濃陰林缺露青嶂瞻岫
集遙姿睇連延近狀改步款蘭疇陟憩紆迴望地偏俗
駕牢侶勝游蹤暢朱義不遽頽沉懽將無蕩

五十篇

四首有序

昔人云五十之年忽焉以至悲始衰也今歲丁酉八月廿二日乃余五十懸弧之辰鑒止足之分傷流光之駛有懷家園思投簪笏乃賦斯篇
五十忽焉至頽齡始自茲懸弧春秋辰稱觴來故知余

本靜者流風好敦書詩散性在丘樊竊祿慙軒墀鐘鼓
享魯郊海鳥終不怡鍾阜洵云美豈若還山茨

山茨結林麓其陽面清池清池曲且廣高楊夾路垂層
樓貯圖史密室藏姜姬出門即湖山興到惟所之偶逢
漁樵侶談讖忘歸期人生行樂耳須富貴何時

富貴反多憂貧賤未足卑靈龜戀泥中雄雞憚為犧李
斯具五刑牽犬一何悲陸機西入洛鶴唳聽無期無才
足完身功高跡轉危所以賢達人拂衣恒恐遲

拂衣謝塵氛舊侶時相追披素詠新賞開帙渙所疑豈
不戀主組天爵無磷緇豈不戀子孫清白自可貽觀民
計已極從道安足嗤申毫著斯文聊以適吾私

餘不溪回舟寄訊章元禮吏部是日雪

吏部才名舊瓊瑶昔見貽山川聞問隔日月鬢毛衰身
退仍憂國家貧但賦詩迴舟緣興盡風雪寄相思

珠簾洞

帝遣銀河垂虛簾蕩空淥我欲買娉婷問爾乞三斛

無題

琉璃硯匣鎮隨身彩筆揮來字字新
他日長門如有恨千金詞賦不求人

王士性一首

士性字恒叔臨海人萬厯丁丑進士
除知確山縣事擢禮科給事中終太僕寺少卿
有五岳游草

惡溪道上聞猿

惡溪不可涉地險亦何心石觸雲根出灘迴窟窟深繁
霜沙際白落月渡頭陰宜異巫陽峽清猿兩岸吟

魏允貞一首

允貞字懋忠號見泉南樂人萬厯丁丑進士除
荊州推官選授山西道御史歷官右副都御史
兵部右侍郎巡撫山西

詩話見泉以直節聞相傳其子廣微甫登賢書
來省其父見泉閉之廨中不許就禮部試曰此
破犂犢也一待志必墮我家聲矣後
果然詩近拘疎論者謂遜其弟懋權

岳陽樓

洞庭天下水岳陽天下樓誰為天下士飲酒樓上頭

徐桂一首

桂字茂吳長洲人居餘杭萬厯丁丑進士袁州

推官有大滌山人詩集

李本寧云茂吳咏物以六朝之才情具三唐之

格調

馬仲良云自弇州歿而禹航徐茂吳先

生代興詩靡所弗工而詠物之章可稱名家

詩話徐君詠物詩最繁富正如盈擔魔
合羅僅供邨市癡兒騷女把翫而已

送義公結廬天台

海上栖禪境披雲訪石橋一併依澗壑疎磬落山椒
華頂經年雪松門半夜潮預愁支遁去誰與共逍遙

張維新一首

維新字憲周汝州人萬厯丁丑進士除冠縣知
縣擢兵科給事中歷湖廣按察副使

萬壽節早朝

六位龍飛日千官虎拜年蒿呼聞漢殿華祝戴堯天綵
仗清霜肅金爐紫霧連不才班侍從跼蹐冕旒前

陳泰來一首

泰來字上交平湖人萬厯丁丑進士除順天府
學教授遷國子監博士升禮部主事歷員外謫
饒平典史泰昌卽昨贈光祿少卿有員嶠集

詩話員嶠年十八舉於鄉十九釋褐歸娶賜內
府金花燈籠知平湖事劉抑亭贈以對聯云秋
進士聯春進士大登科後小登科鄉里榮之而
公以氣節自許居太學忤江陵因三王竝封面
質太倉於朝房又疏請建儲既因計典疏救孫
鑪謫饒平典史陞辭就道賦詩有直道不緣三
黜改孤忠或受九重知卒時年三十有六耳謫
歸日夢至一山羣仙咸集賦詩云涼風拂拂白

雲收宜海年年幾日休翦紙作驢輕撥刺桃花
洞口笑淹留相與樂甚旁一仙云汝乾凌子也
後一年當再會于此覺而
以乾凌子自號踰年而沒

客中午日

客裏端陽也自娛呼童沽酒汎菖蒲
家園咫尺汀蘆外
艾虎朱絲事事無

顧紹芳
五首

紹芳字實甫太倉州人萬厯丁丑進士改庶吉
士除檢討歷左春坊左贊善兼編修有寶庵集

詩話實甫工於五律不露新穎矜鍊
以出之頗有近於孟襄陽高蘇門者

同公亮敬承茂仁郊遊

共道尋春好兼之出郭幽林塘三月暮休沐幾人游樹
樹陰初合溪溪澹不流從來耽野趣即此是滄洲

即事

小閣上干霄幽人野望遙澹雲清曉樹疎雨綠春苗天
閣前朝寺風多隔浦橋心期竟何託鐘磬日蕭蕭

喜陸彥先至

常憶秋風裏離尊共黯然所期寧此地相見忽經年白
眼時人過青山旅夢牽懸知有新語羞屬蒹葭篇

山亭閒居

豈有避人意經秋長閉關蕭然松下戶對此城中山得
雨深林映隨雲倦鳥還漸諳丘壑理聊復養衰頑

舟行卽事

願得三千里飛帆一夜還生憎衛河水十步九成灣

沈自邠五首

自邠字茂仁秀水人萬厯丁丑進士改庶吉士

授檢討歷修撰有沈修撰詩集

蔣馭閱云先生詩風格端麗意

調諧適合乎
風雅之正

送徐洪陽侍講使荆

送別青門外雙旌去路賒
楚天高擁傳江瀨隱浮槎
赤社開王胙金莖憶帝家
上林新賦就雲夢未應誇

白下留別賀伯闇

高閣經旬別孤帆
此日開風塵催作客
花鳥負銜杯細

雨白門樹浮雲江上臺相期不相見愁思轉難裁

送高蓋卿少叅

驛騎花前發東風二月過漢家新節鉞秦地舊山河津
樹關門合春雲渭水多西臺誰領袖咫尺望鳴珂

謁關忠義侯張桓侯祠

赤伏符難再三分志未伸江山千古恨祠廟百年新事
業歸龍戰飛揚憶虎臣雄風今尚在灑淚向高旻

馬文莊公挽歌

美謚殊恩錫東園祕器分濟時功尚在接武事仍聞丹旆飛燕雪清笳斷隴雲西州徒有恨曲罷淚紛紛

朱維京一首

維京字可大萬安人萬歷丁丑進士歷官光祿寺丞有光祿集

度飛虹橋

鯨海遙涵一水長清波深處石為梁平鋪碧甃連馳道
倒寫銀河入苑牆晴綠乍添垂柳色春流時泛落花香

微茫迴隔蓬萊島不放飛塵入建章

沈九疇二首

九疇字箕仲鄞縣人萬厯丁丑進士除刑部主
事稍遷至郎中以按察副使提學江西歷官江
西左布政使有曲轅居詩集

詩話箕仲以詩名重鄉里人有持所作謁文恭
者輒笑曰家弟安知文奚不就我族父嘉則以
豐對樓詩屬余君房論定君房報書云吾於詩
僅窺其藩未入其室此事終當屬君家箕仲於
是嘉則詩經其刪叙及掌江西左轄有中使來
司權先檄諸長吏迎勅箕仲宣言曰勅諭中使

非勅守土吏也例不當迎中使為氣沮一日中
使移書自稱予箕仲叱其使曰往惟高皇帝起
吳時曾稱子若中貴人何敢爾中使大懼
立造謝其直節自遂亦文恭所不如也

善哉行

今日樂兮來日可悲天迴地游人莫之知

一解

彼絃我歌

會少離多明星可掇肅駕經過

二解

三十六輻輪輪相復

但惜馬蹄不惜車軸

三解

雨中簡吳山人汝震時寄居鐵柱觀

倚柱看黃鳥窺檐拂翠條
吾衰春亦去汝病興還饒
山

色樓中雨江聲郭下潮何如平楚外烟柳赤闌橋

楊德政 二首

德政字公亮鄞縣人萬歷丁丑進士改庶吉士
除編修出為福建參議遷副使調廣西陝西提
學歷山東參政福建按察使有夢鹿軒橐

苑田觀穫

南風吹城闕西苑鳴桑鳩帝畝雨露偏田畯職亦修維
時麥稼登滿地黃雲稠播植良苦艱喜見千倉收皇情

念民依感之紓殷憂願以庾廩資勤息覃遐陬詠哉七月篇庶幾追成周

河西阻風戲示同行者

失路依依獨問津楊花飄蕩撲征輪東風正似郵亭吏只解迎人不送人

蘇濬 三首

濬字君禹晉江人萬厯丁丑進士除南京刑部主事尋改工部轉禮部員外郎出為浙江提學

餘事歷陝西參議廣西副使貴州按察使有三

餘集

曉發界河

客路逢秋杪中原曙色分
無情原上草不斷嶺頭雲
醉月懷梁苑觀風過汝墳
楚天看漸遠何處問湘君

卧病

華髮星星短浮雲冉冉流
客中千里淚夢裡五湖秋
肺病傷春盡商歌入暮愁
浮沉君莫問大壑一虛舟

哭王恒甫茂才

何處悲風急淒然獨掩扉
斷雲空漠漠宿草故依依
一夢愁如昨千秋事已非
青山堪共老垂老忽相違

陸懋龍一首

懋龍字啟原鄞縣人萬厯丁丑進士除合肥知縣
選授兵科給事中歷刑科都給事出為湖廣
叅政

小院

小院幽陰似井間風枝墮地點苔斑何時鏟却重檐去
露出西南一角山

丁比呂一首

此呂字右武新建人萬厯丁丑進士歷官湖廣
布政司叅政有世美堂橐

雨中望勾漏

迢遞策敝車言尋稚川子風雨何淒其蕩然滌塵滓濛
濛山下雲泠泠峽中水雲水幽以深徑路憑誰指丹竈

突無烟白石徒齒齒至今不可攀邈焉懷斯理我家西山陽許令實同里玄都計非遙赤縣更伊邇沖舉遽難期沉淪恒自恥孺子儻可言請為公納履

周汝登一首

汝登字繼元嵎縣人萬歷丁丑進士除南京工部主事謫兩淮運司判官遷順天府通判轉南兵部主事出為雲南叅政有海門先生文錄恭聞冊立皇太子諸王亦以是日受封志喜

震索從天授年將德共宜尊師開閣早問寢出宮遲太
后殷勤訓諸王次第隨微臣棲隴畝萬里想威儀

孫成泰一首

成泰字允交平湖人尚書植子萬厯丁丑進士
除知道州遷蘇州府同知入為刑部員外歷郎
中升饒州知府調邵武再調福建鹽運司同知
以按察副使整飭大名道

送尤司訓

送君湖上正斜曛
楚水吳山咫尺分
今日莫辭杯底醉
數聲風簾片帆雲

吳安國 七首

安國字文仲長洲人萬厯丁丑進士除真陽知

縣調永康徵授刑部主事歷員外郎中出為寧

波知府升本省副使有葆光軒橐今是堂集

屠緯

真云文仲詩語不必琢惟其骨勝辭不必靡惟其趣長才與情宣意將格會

劉玄子云文仲

近體有大厯家法何穉孝云文仲高不亢卑不抑導之泉注頓之山安

詩話文仲純叔之子南夫之孫詩是家學其自序曰今之為詩者矜一字之長競片語之巧張為吾黨侈為此道凌轢同列持撫前人逞傲誕之風長浮華之習蕩闊檢而不顧棄率職其若遺則詩之為靈甚矣蓋嘉隆之間習氣如是稍有學識者知厭之

遊武夷

十年懷名山薄遊未能至
弭節偶茲辰探奇始欣遂
層峰抱迴谷長林引深邃
烟霞鎖冥濛指顧詫靈異
玉函閤遺封勝跡符往記
洄沿九曲溪溪溪落空翠
水木澹澄暉冷風送餘吹
登臨兩稱絕幽期愜遐企
願謝區中

緣浮生永斯寄

秋日偕孫太史萬都諫王比部侯奉常趙大行郊
游憩禪寺得遠字

嘉辰值休沐晴郊恣游衍秋色淒以清深懷託所遣回
颺振叢樾間雲入幽巘眷言二三友同心自繾綣垂楊
十里陰清流一溪轉稍憩初地偏頓覺塵心遠歸鑣故
夷猶移觴欲忘返何當置丘壑一笑謝軒冕

領郡出都留別諸君

明時忝嘉招，薄游謝遠度。
孤衷夙寡諧，恬漠有遐慕。
結交二三子，實以賢豪故。
覽古窮皇墳，搞華託豪素。
本乏希世資，還甘守遲暮。
襜褕被辭舊，廬分襟阻清。
晤徘徊戀餘尊，慷慨卽長路。

雲崢丈邀登清源山

出門欲看山，山翠忽在眼。
俄從平野登，旋傍迴溪轉。
層崖屢攀緣，仄徑縱凌緬。
雲氣抱石幽，烟扉隔林淺。
地主何風流，開尊向絕巘。
情同永嘉適，藻擬宣城撰。
塵蹤有

離析高情自繾綣執手千古懷茲山亦齊峴

元日紀事

曉飾嚴城禁宵傳獄市驚閉門空大索出桺已橫行桃
梗難除惡椒觴罷賀正爾曹堪一笑吾自掩柴荆

登北固山甘露寺

寺憶南朝古山橫北顧遙千峰圍鐵甕雙髻擁金焦隔
岸維揚樹空江建業潮高樓信多景秋意獨蕭條

寺有多景

樓

江行

江樹浮疑沒江雲散復凝
疎燈明極浦處處有魚罾

徐三重二首

三重字伯同松江華亭人萬歷丁丑進士除刑

部主事有天真齋草

詩話伯同甫含雞舌遽返鶴沙息軌杜門研朱
讀易其叔子禎稷出守夔州畏家誡之嚴不寄
一物賦詩云丙穴有魚堪作膾因
風不敢寄高堂足徵其守之介矣

送友掌教射洪二首

莫歎青瑣作客寒聖朝猶是重儒官鼎烹鼎食知多少
誰似先生苜蓿盤

江流欲盡是巴西巫峽荆門烟樹迷遙計客帆行到處
亂山斜日子規啼

張敬二首

敬字爾和淄川人萬厯丁丑進士除中書舍人
遷禮部主事有儀部集

詩話明初駙馬家有學錄嘉靖六年以禮部主
事金克厚授都尉謝詒經書後遂因之主事教

習駙馬者爾和其一也爾和不以詩名所作寥
寥附文集之末聲律未能悉諧然頗有生趣如
曇花侵斷壁木葉響空廊鶯下啄寒葦猿垂
颺古藤故人滄海隔歸夢白雲深亦自流暢

聞鴈寄王侍史

搖落聞征鴈連翩向海隅行分絕塞闊影入夕陽初鼓
角寒城急關河短鬚疎那能千里別不寄一封書

寄王汝賓

山房黏石壁蒼翠暮烟收野水亂流合沙禽幾點浮人
歸櫺葉寺月映蘆花洲白露澄江闊故園何處秋

朱應轂 二首

應轂字德載濬縣人萬厯丁丑進士除東阿知縣擢貴州道御史尋改山東道御史巡按貴州再改雲南道御史巡按淮揚卒于官有槐石集

詩話德載近體亦自羅羅清疎

中秋登東阿城樓

東郡逢佳節南樓上小梯牕迎歸鴈近坐覺遠峰低魏闕燕山北黎陽魯甸西清輝真可戀不寐信烏啼

東流泉

清流環曲徑翠色映遙岑山靜少人跡林深多鳥音雨
餘雲破練月上酒浮金千里來知己同游愜素心

鄧汝楫二首

汝楫字原剡江陰人萬厯己卯舉人官慈利知
縣調龍門

晚行

澧上驅車晚前途日已傾寒禽依古木山鬼瞰荒坪路

入邨烟直燈分野燒明不勝寥落恨況復歲華更

將至清源作

清源看不遠暮色逐征途寒入蕭蕭樹身隨汎汎舫
舟漁火亂明月水天孤苦受微官縛高陽媿酒徒

張修德一首

修德字季成江陰人萬厯己卯舉人

下第歸兗州道中遇雨

雨橫風狂三月天長塗游子倍潛然鄉心對酒渾無賴

倦馬衝泥苦不前
委地落花空寂寂
隨人舞燕故翩翩
自憐輸却山牕客
一枕玄經日晏眠

馮大受一首

大受字咸甫松江華亭人萬厯己卯舉人有竹

素園詩集

登岱

直上中峰頂方知泰岱尊
岡巒迴地軸星斗挂天門
孤嶂秦皇碣清池玉女盆
仙人雲外度白鶴日飛翻

黃克纘一首

克纘字紹夫晉江人萬厯庚辰進士除壽州知
州入為刑部員外累官太子太保兵刑工吏四
部尚書有數馬集

將出都門和瀋王見懷韻

平臺踰履憶當年榆莢楊花四月天授簡總慚枚叔賦
耽詩獨記楚王賢寒嘶匹馬春明外晴落孤鴻魏闕前
南去虔州千萬里薊門章水各風烟

許弘綱一首

弘綱字張之東陽人萬厯庚辰進士除績溪知縣累官南京兵部尚書

丁酉再告

多病年來不耐官柴門柳色意中看偏於萼菜思張翰
自分圍棋老謝安長日生涯惟點易故人書問且加餐
畫溪烟雨春蓑綠重與君王乞釣竿

陶長庚一首

長庚字元白平湖人萬厯庚辰進士知六安廣
德二州升刑部員外進郎中改南吏部出為湖
廣參議歷官江西左布政使遷應天府尹南京
通政司使

感興呈景陽兄

林藪原吾志年來遠市朝青山歸計穩白髮壯心凋夢
逐翻風蝶名成覆鹿蕉小牕休沐暇閒步頌逍遙

龍膺一首

膺字君御武陵人萬厯庚辰進士除徽州府推
官謫温州府學教授稍遷國子監博士升禮部
主事復謫兩淮鹽運判官轉鞏昌通判歷同知
遷南戶部員外郎進郎中出為按察僉事歷叅
議副使仕至南京太常卿有九芝集

南歸聞鴈

征人家近住瀟湘楓葉初丹橘柚黃憑爾先將歸信寄
莫言風雨隔衡陽

石崑玉一首

崑玉字汝重黃梅人萬厯庚辰進士除戶部主
事歷郎中出知饒州蘇州紹興三府升山東按
察副使轉福建叅政以右僉都御史巡撫大同
有石居士集

燈市

燈市百貨聚類聚還分局雜沓掩塵埃穹窿象山谷滿
城恣意觀履舄時交觸側肩趁友朋轉盼遺童僕樓上

樓下人徒倚自相矚
佻佻白面郎
囊裏金如粟
訪古并探奇
十僅償其六
本擬快於心
旁觀容有覺
為君話所從
原出巨家櫝
向購此場中
而今在此鬻
佇看市道間
何事無翻覆
物類火傳薪
人寰風轉燭
拚諸海陸珍
權與豪華蓄
姑數杖頭錢
來酣春酒熟

姜士昌一首

士昌字仲文丹陽人萬厯庚辰進士除戶部主事歷員外郎中出為陝西提學副使遷參政卒

贈太常少卿有雪柏堂橐

春日郊行

金張亭館帝城邊
北里南鄰競管絃
山鳥日來游客醉
曲池芳草自年年

余寅二首

寅字君房一字僧杲鄆縣人萬厯庚辰進士除
工部主事轉禮部員外歷郎中出為陝西提學
副使遷山東參政入為太常少卿有農丈人集

詩話君房自負古文然與作者尚遠其於詩自謂涉其藩未窺其奧亦自知之明相傳少日夢人曰君命同孔子年至七十三無恙後二年奉川產一麟持獻太守太守使吏來白君房曰吾其死夫未幾果卒萬八處士斯同嘗語予云

魯橋邨

半景臨墟塢雙榆闢里門秋風吹巷陌落日喚雞豚野
外桑麻闊山中父老尊喧喧邨釀集賽鼓正黃昏

送包明臣之任潮陽簿

七閩路盡是潮州莽蕩風烟漲海頭溪洞水腥常作霧

枕柳葉暗不知秋
琵琶洲畔蛟為窟
甲子門前蜃是樓
只有羅浮山色好
蕭齋長得破羈愁

王德新一首

德新字應明安福人萬歷庚辰進士除南京兵部主事改刑部坐建言為民起補南工部遷光祿寺丞有做所先生集

王希泉云光祿韻也神怡珠端玉輝歸然風人

雅致

期登羅陽

羅浮烟雨滿空山
千仞崖藤尚可攀
煮石眠雲誰禁得
律僧翻羨老夫閒

葉初春一首

初春字處元吳縣人世居洞庭自號吳西主人
萬厯庚辰進士除廣州順德知縣擢兵科給事
中歷戶禮二科左右給事建言為民天啟初追
贈先祿寺少卿有吳西佚橐

詩話先太傅文恪公兩主鄉闈辛卯江西則吳
西葉公為副丁酉南畿則福清葉公為副皆齊

心一契闕節不到者南昌徽棘之後葉公游讌
必俱嘗偕過錢柱觀羽士言是許旌陽鎖蛟處
先公以豫章城築自灌嬰而李白詩有浪動灌
嬰井潯陽江上風之句辨此井即是滕公遺跡
葉公大以爲然先公賦五言有云潮生浪亦動
疑是灌嬰井我言殊怪牒給事默心領蓋紀其
事也既而先公掌容臺建儲之疏公私凡七十
上最激切者劾鄭國泰一章而定陵不以爲忤
葉公以爭豫故再疏去官進言固有幸不幸也
葉氏流芳錄二卷載公疏草及門弟子挽詩公
之韻語流傳特寡留別徐少南一律手書存少
南族孫上舍惇復所楮墨漫漶以意補其闕字
之存

梁谿留別徐少南

直北三千里郵籤第一程
渾忘相送遠誰道別離輕
驛火抽帆宿河水策馬行
不知游子夢仍戀闔閭城

邢雲路一首

雲路字士登安肅人萬厯庚辰進士知繁昌汲
臨汾三縣升兵部主事由員外出為河南僉事
歷參議副使終按察使

西湖竹枝詞

裏湖外湖春水深
斷橋不斷入湖心
郎在外湖唱吳曲

妾在裏湖吟越吟

彭夢祖一首

夢祖字應壽全椒人萬厯庚辰進士除戶部主
事歷員外郎中出知雲南府調南康升浙江按
察副使進參政致仕有彭應壽集

登岱

空濛寶殿俯長天萬里中原亦緲然水落山根先入濟
夜涼斗柄欲捎燕松陰曾濕秦時雨玉筴長封漢帝年

好借西風為羽翰圖成五嶽杖頭懸

車大任 三首

大任字子仁邵陽人萬歷庚辰進士除南豐知縣歷南禮部郎中出知福州嘉興二府升浙江

按察副使進右參政有囊螢閣草

屠緯真云子仁詩色華而

不豔音俊而不靡妙得詩家所賞而不犯詩家所忌足稱擅場

陳玉叔云子仁詩有風致而

不傷于境有才情而不泥于

氣和平溫厚得古人之遺

詩話子仁見賞于吳明卿明卿贈之詩曰靈均忼慨追三后太史憑陵陟九疑子仁深自喜也

詩頗閒放
無局促態

金谿苦雨

咫尺金谿道年來幾度過郵程千里急鄉夢五更多雨
色迷芳草風聲走濁河泥塗軒冕意去住欲如何

送吳求叔還蒲圻

我留君且住盡日醉春醪作客修長缺歸心慰大刀
片帆淮浦遠匹馬楚山高莫負重來約相思夢寐勞

與臨清武雙溪

十載相逢章水濱與君同醉異鄉春誰知今日清源道
又向天涯別故人

袁年

四首

年字子壽吳縣人萬厯庚辰進士除南京兵部
主事歷員外郎中出知青州府遷江西按察副
使轉雲南參政有觀槿齋集

詩話子壽五言雖少
精詣不墜骨壘家法

白水道中

驅車上山巔俯瞰人如蟻及從澗底行仰觀亦同此地
位有崇卑所見因乃爾林端宿鳥鳴天際浮雲起前村
可息肩澄心會玄旨

荆江感懷

浩浩荆江流要渺望不極風雲倏迴翔日月自出沒勢
合巫峽通地分吳楚圻豈不稱天險中原非所亟吳蜀
多英雄交爭遂相迫豺虎白晝嗥吞噬安所惜烈士負
孤忠震怒天為戚千載垂芳聲至今有餘赫臨流惻愴

滋涕泗霑巾幘

豫讓祠

智伯已亡後誰復君父讎傷哉一豫讓寧為刺客流恩
深國未報形毀心獨留成敗不足論慘辱非所憂願為
知己殉恥同肉食謀橋下試一擊廁中仍再投蠶粉志
始畢此外庸何求嗟嗟二心人過此良足羞

雨宿一雲寺

蠟屐候新晴攜尊陟西嶺松間聒濤聲樹杪挂瀑影雲

起日欲晡雨來山亦暝徑窄怯筇躋林寒覺衣冷言投
方外居因嘗雨前茗堂懸燈一栗門擁墨千頃鳴禽寫
幽泉頓使萬慮屏

楊于庭一首

于庭字道行全椒人萬歷庚辰進士除濮州知
州徵授戶部員外轉兵部郎中有楊道行集

贈李修吾轉南祠部

見說君王已賜環金陵亦在五雲間兩都爭識神仙吏

三禮仍居侍從班
伏枕鄉心懸碣石
挂帆秋色照鍾山
謝公墩上重回首
絕代風流尚可攀

董嗣成 六首

嗣成字伯念
烏程人
萬曆庚辰進士
除禮部主

事歷員外郎
中建言削籍
有青棠集

謝在杭云
伯念古選

憲章陶謝近體
沐浴岑王
如藐姑射仙人
餐風飲澹

詠懷

高臺多悲風
深坻多秋草
男子志不伸
吐吐縈懷抱
盛

年不可留誰能常壽考尚平游名山婚嫁苦不早我思
采紫芝逍遙以終老

湖中夜泊效謝體

落日沉遠樹寒烟出孤城湖中鷗鷺起沙際蟋蟀鳴社
鼓發初響漁燈漾微明遙岑漸以沒但見蒼烟平空水
饒雨色雲林散秋聲未深宋玉悲良懷遠公盟獨步縱
遐矚曠焉寄微情

發青陽驛

條風啟征塗于邁自旭日旦覽古舒遠懷解紱謝微絆廣
衢殘雪開遙甸芳萸散遠揚既載數谷禽亦時轉尚游
達者心點狂聖所贊唐風詠山樞感物有餘歎

嚴道澈過訪不值寄懷

河漢光皎皎照我彈鳴琴寂寂感物候白露霑我襟絃
絕不復調良夜空沉沉抱此孤桐還藉以寄知音

賦得關山月

晚角開金鏡清笳落曉鈎關河今夕影迢遞幾人愁瀚

海殘冬夜平沙古戍樓誰能歌出塞腸斷玉京秋

渡江

搖落長干道淒涼楓葉丹殘霞連海盡細雨入江寒楚
樹帆前沒吳山夢裡看鄉關悵回首長路正漫漫

臧懋循

四首

懋循字晉叔長興人萬厯庚辰進士官南京國
子監博士有負芑堂詩選

詩話何元朗臧晉叔皆精曲律元朗評施君美
幽閨出高則誠琵琶之上王元美目為好奇之

過晉叔謂琵琶梁州序念奴嬌序二曲不類則
誠口吻當是後人竄入元美大不以為然津津
稱謂不置晉叔笑曰是惡知所謂幽閨者哉嘗
從黃州劉廷伯借元人雜劇二百五十種又購
得楊廉夫仙游夢游俠游冥游彈詞悉鏤板以
行序言鄭若庸玉玦張伯起紅拂等記用類書
為傳奇屠長卿曇花道白終折無一曲梁伯龍
浣紗梅禹金玉合道白終本無一散語均非是
且言汪伯玉南曲失之靡徐文長北曲失之鄙
惟湯義仍庶幾近之而失之疎其持論斷斷不
爽詩亦不墜七子之習故雖從元美譏
游不入四十子之目亦磊落之士也

送茅孝若應舉

握手離堂夕椒盤與菜盤春風吹遠道游子入長安玉

躡裝詩軸黃金飾馬鞍
桂枝行可掇計日為彈冠
得吳載伯書却寄

昔有三秋鴈曾傳萬里書
開緘先涕淚跪讀更何如
白髮添愁鏡黃金罄客居
不知相見日還隔幾年餘

望亭夜泊

向暝投何所依依識望亭
客舟今復至津路昔曾經
瑟瑟風吟樹離離鴈度汀
翻令鄉思逼數起視明星

答汪仲嘉

客路經春侶伴稀
故鄉回首淚霑衣
不知若箇吹長笛
一夜梅花似雪飛

章嘉楨四首

嘉楨字元禮德清人萬厯庚辰進士累官大理
寺丞有姑孰集南征集中林草

書座右

見鹿指成馬聞蟻以為牛
明乃戒獨任聰亦何深求
谷風方習習草萎萬木秋
瞻彼江漢波鱗甲鮮安流
我愛

曹平陽醇酒以忘憂

三湖

丹陽石
臼固城

水落三湖滙洲渚若阡陌水至三湖連彌天浩浩白怒
濤漂田廬驚風斷塍埒豈無蘋霞照覩之慘胃臆亦有
蓮與芰不充飢者食民力疲堤工民命寄河伯湛酤湖
之陰精裡冀昭假

齊雲山下溪行

白岳朝真罷乘桴下小溪急湍清見底芳草踏成蹊倚

樹山樓出眠鷗浦淑低不須歌越調落日到城西

勸農

溪邊千嶂朝含雨竹杪一鳩午喚晴雲漏日明油壁暖
吏人打鼓勸春耕

張恒十三首

恒字伯常蘇州嘉定人萬厯庚辰進士知茶陵
興國二州入為刑部員外郎出知饒州府再知
建昌歷按察副使升太常少卿有明志橐

詩話伯常自序其詩謂語不必工意不必遠古
不必合今不必離生不必名沒不必傳聊明吾
志而已矣又曰譬諸候至而物鳴若有使之而
不能已者以寫其優柔愴蕩之思數語非知詩
者莫能言也宜其古風磊落近體亦
安詳比於同邑四先生似覺挺拔

合歡詩

庭前雙瓊樹嘉實何離離鳳皇忽來巢載鳴復載飛鳥
常比其翼樹亦連其枝宛若夫與婦燕爾良亦宜綢繆
結深心嫵婉要終期登樓操琴瑟音響一何諧人生在
志合豈必及宴私和德家乃昌泰交亦若斯

百感詩

六首

渚鴻不登木，蓼蟲不集芥。物性寧可移，足已復何待。
處卑夷即適，茹苦習亦快。魯享爰居悲，衛軒野鶴駭。
藿食而衡棲，自顧亦云太。處身勿靳高，但置風塵外。

射干生山頭，挺榦故不長。叢蘭發澗底，隨時播幽香。
高下殊所託，物性自有常。富貴多疵辱，貧賤愉且康。
負乘為寇媒，考槃古所臧。素心苟無瑕，跼伏道彌光。

富貴世所希，不如賤與貧。得喪在須臾，轉盼殊戚欣。
居

卑無隕墜處約離垢氛賜憲既異軌管華豈同倫丘園
有餘賁抗志罔不伸揚衡閱世俗營營多僂民

肅后秉睿哲於赫振乾剛永嘉既爰立密勿謨孔良言
念撫鎮臣搢紳雜貂璫一朝決宸衷峻此閤寺防悉令
還埽除無使穢封疆厥謀貽神孫昭然垂典常猛虎入
柙中縱之騁康莊祖武近可繩聖心應不忘

青蠅何營營趨利百其孔採權徧山海方輿為之動妖
狐導猛虎城市日接踵帑金高於山源竭川流壅大決

誰為防哲士心獨恐盡吸羣民脂蒿目悲林總渙居寧
可期滿覆胡弗悚

宣聖昔惡佞末俗佞乃尊小佞佞以言大佞佞以文富
貴止好諛工拙不復分諛生眩屏幃諛死媚丘墳稱引
豈不工清論淆且勞哀之費緡帙曷若烈火焚

仲夏偕阮步文孫子極遊麻姑山

良遊信多幸申約晨忽霽采真實天假選勝情亦銳攀
陟凌烟空雲霞生衣袂古壇隱松間紅泉響天際曠焉

見田疇知否有井稅已覺鷄犬殊時聞鶴鶴喚神仙何
悠悠人代倏已逝千秋不可知遐覽有深契暮野烟霏
霏宵巖星曄曄幽討愜予懷世緣脫如箠

步文子極偕游從姑

峩峩靈峰石雙折若初判鑿磴纔受趾陟崖迥迫面鍾
磬出雲端杖屨入天半眷此清和月萬象俱蔥蒨日晃
搖沙金林疎出江練蜿蜒圍暮嶺森錯分晴甸軍山聳
孤髻麻瀑飛一綫俯視何蒼茫俄頃嵐光變古今杳相

接登覽時哲換嘉會洽懽悰長懷託文翰

荊州

迢遞長征客徘徊故郢墟風烟平野闊沙月大江虛峽
近啼猿切天寒落鴈踈蕭蕭荒草遍惆悵楚宮餘

憶槎上舊居

千古浮槎處吾廬乃在茲雲沙重護宅潮汐宛通池野
鳥啼花徑漁人唱竹枝白衣諸故老伏臘互傳卮

喜雨

赤魃驕何甚辛勤父老情民惟依稼穡身可代犧牲雨
應迎龍至雷和賽鼓鳴自非天澤徧何以謝蒼生

涼州詞

壚頭酒熟葡萄香馬足春深苜蓿長醉聽古來橫吹曲
雄心一片在西涼

張萱六首

萱字孟奇博羅人萬曆壬午舉人授殿閣中書
歷戶部郎中有西園全集

詩話益奇熟於典故周見洽聞著書頗多其在
西清重編文淵閣書目具載卷帙補前人之闕
漏惜乎香厨所存
已失其什尤矣

茱萸灣懷古

茱萸灣頭蘆荻花秋風高日蒸紅霞夜深打鼓負鹽去
潮平軋軋鳴歸艤竹西歌吹杳何許垂楊兩岸黯不語
一聲江笛叫江樓劃斷寒雲不知處

邗溝懷古

不盡邗溝水微茫日夜流潮連揚子渡烟接海門秋樹

影浮荒堞蟬聲到客舟興亡無限意落木共悠悠

過亡友韓伯舉故居

主鬯依難弟遺文起後人一生惟好客到死不言貧
門巷渾如昨池臺倏已新青山空滿地痛絕未埋身

贈馮慕岡華省哀何玉峴南還

往事誠顛覆今皇自聖明孤臣瀕萬死中詔賜餘生
司馬能逃腐弘羊正待烹已聞干象緯不用借公卿

自廣濟至澱水

峭帆斜日挂危檣
疊鼓呼風亦太忙
却聽舟人話潮信
欲乘新月汎錢塘

漁村

籬堤時築亦時崩
野水曾侵竹幾層
一任漁郎竹根宿
夜歸猶得借漁燈

何三畏 二首

三畏字士抑松江華亭人萬厯壬午中順天鄉
試選授紹興推官有芝園居廬集鳳山拜石堂

橐

陶周望云士抑詩備諸體不專一家唐元徵云士抑揚屹風雅有餘蘊綜敘今古有餘

采辨晰名理有餘味董思白云士抑居廬詩如哀螢勞鴈使人聞而泣下

贈蘇爾宣卜居吳門

金閶南市北市虎阜前山後山天色不風不雨先生獨

往獨還

金山寺口占示徐澤夫兼寄諸友

先是澤夫北行余同友人錢席

至是乃

同發

金山頂上三竿日揚子江頭一度春記得故鄉同送別

如今也別故鄉人

來知德二首

知德字矣鮮梁山人萬歷壬午舉人以薦授翰林待詔有釜山詩集

詩話待詔歌鹿鳴諸書不詳年歲詢之蜀人言是嘉靖中而黃徵君俞邵分撰明史藝文志注云萬歷壬午或有所據姑從之俟再考相傳待詔隱萬縣之求溪二十九年注易始就今其書盛行而詩非專務易義亦非創獲蓋僻在一隅罕見羣儒之論述此自信之過遂蔑視諸先輩耳

春風辭 二首

春風起兮花殘有美人兮江干三年不見兮路漫漫遠
莫贈兮木難歲崢嶸兮將暮心惆悵而難言及榮華之
未落曷不驂夫翠鸞使我執手兮盤桓

春風起兮花落有美人兮江閣三年不見兮路沙漠遠
莫致兮金錯日窅窅兮下山竹紛紛兮解籜及青春之
未徂曷不跨夫黃鵠使我並坐兮偕樂



明詩綜卷五十八

總校官庶吉士 臣張能照

校對官庶吉士 臣嚴福

謄錄監生 臣蔣大鎔

欽定四庫全書薈要

集部

明詩綜卷五十九

詳校官編修臣汪鏞




欽定四庫全書薈要卷二萬五百三十二

集部

明詩綜卷五十九

翰林院檢討朱彝尊編

 國祚五十八首

先公字兆隆號養淳秀水人以太醫院籍補順天府學生萬歷壬午中鄉試明年癸未賜進士第一人除翰林院修撰知起居注己丑充會試同考官辛卯典試江西歷司經局洗馬遷諭德

丁酉典試應天進右庶子戊戌以禮部右侍郎
兼翰林院侍讀學士攝禮部尚書事壬寅轉吏
部右侍郎引疾歸光宗即位起南京禮部尚書
是年命入東閣加太子太保進文淵閣壬戌主
會試尋以戶部尚書兼武英殿大學士加少傅

回籍卒贈太傅謚文恪有介石齋集

曹潔躬云
吾鄉鉅公

若呂文懿項襄毅屠康僖朱文恪俱研心風雅
而不與作者爭名文恪詩尤婉秀軒軒霞舉一
無俗塵望而知其品之清也朱朗詣云先大
父文懿公嘗過秀水文恪不出迎既升堂先公

意不憚詢之則文恪袍帶留質庫方令人取之
歎息不置其清介如是詩亦非肉食人語正如
冰荷在壑冷香襲人陸麗京云易稱知幾詩
詠明哲朱文恪足當之聞利瑪竇進異物公曰
此輩小智足以惑人將來必有助之更厯法者
景陵詩派初行公覽之驚曰安得此亡國之音
吾不忍見之也知幾其如神乎俞右吉云太
傅清而能容質而有大力體忠著三朝無事不可
為後世法即以詩論自抒性情不事沿襲諸體
俱合不失正始之音鍾廣漢云文恪處門戶
紛爭之日中立不倚人所難能建儲事公私疏
七十其劾鄭國泰云本朝外戚不與政事冊
立非國泰所宜言可云犯顏強諫不畏彊禦矣
而吳人有先撥志始一編沒而不書則以公名
不列東林之籍也尚得謂公非公是乎公與福
清同年入翰苑同典試南畿晚歲同心輔政聞

福清初告歸中塗絕不會客獨過公譚譚三日
然後行公贈詩有拙免書鉤黨衰猶話典墳公
蓋自安於无咎无譽矣公初不以詩名而同時
浙右諸公未有過焉者俞右吉云萬厯之初
詩家陳陳相襲風雅幾於喪矣獨嶺表歐楨伯
黎維敬區用孺三君旗幟一新劔刃初發時構
李則朱太傅兆隆李博士伯遠吳興則鄭侍御
允升皆不沿七子之派繆天自云定陵中歲
吾鄉朱文恪公業與臨朐馮文敏同被命入閣
將宣麻矣沈閣老蛟門以密揭止之遂以少宰
歸田復車栗杖偕同里郁伯承游天台鴈蕩諸
山吟詠不輟其詩率寫胸臆未嘗摹仿前人惜
其集未刊行為鄉曲一老儒塗
竄朱墨混淆難辨失其真矣

雩禱篇

朱鳥協上序蒼龍啟佳辰我后隆祀禮羣生潔明裡紺
筵羅彩旒瑤圖吐文茵雲歌逐清漢鳳管徹蒼旻蘭羞
既云薦精誠亦已伸靈液以時敘而康億兆人

同葉給諫過鐵柱觀

有序

南昌鐵柱觀相傳為晉旌陽令許遜鎖蛟處按
唐李白詩云浪動灌嬰井潯陽江上風豫章城
灌嬰所築疑此即灌嬰井也萬厯辛卯九月予與
葉給事典江西鄉試畢偕游是觀覽其遺跡證

以李詩給事然予言爰賦詩十二韻以紀其事
微瀾遠通江水黑照無影誰鎖戟尾蛟繚以千丈縵神
州八柱外於此得塹穿地戶闢趙尊真靈位陶景人言
母支祁神禹昔鉗頸要當去民患不在遠方屏凍鐵斷
繡花終古但嚴冷九派潯陽流有時風力猛潮生浪亦
動疑是灌嬰井比於渴馬厓術可驗糠粃我言殊怪牒
給事默心領請誦白也詩可以發深省

九日飲涵虛閣和葉進卿作

傑閣峙層霄來游屏鬱快晴臨山靄逼遠見宮雲敞天
氣日以清江光一何爽嘒嘒候鴈鳴汎汎寒潮長登高
循令序勝引屬吾黨甄藻協夙心爨桐得新賞絲絃乍
出榼細菊且浮醢席移鳥遷樹坐久月乘幌一唱白雪
音滋我丹霞想

蘇州送君輿姪赴試北上

駕言勞舟發送爾出金閭游子將何之行行入帝鄉帝
鄉日已近佳氣愈蒼蒼俯視碧水流仰看浮雲翔情隨

水偕遠意逐雲俱長重寶抱璫璵殊材堪棟梁努力獻
文賦佇聽聲名揚

天台道中同郁伯承賦

游目覽層峰攜手攀高嶺舉步若登天畏塗復顧影喬
柯聳白雲深壑陷丹井落日猶半規山色已先暝但愁
寒虎嗥不嫌老鶴警忽聞下方鐘頓使千慮屏安得百
丈厓縋以兩修綆

天台

人言天台高四萬八千丈中有瀑布泉飛流衆山響多
少采藥人石梁不得上我思斲壽藤削作過頭杖挂上
最高峰雲中一拊掌

俞右吉云王獻之能為一筆書陸探微能為一筆畫郭恕先能為一

筆風箏圖此詩雖五十言一氣融貫即謂之一筆也可

石鼓歌

橋門左右獵碣十形如古礎相排連窪中或與蘂白似
抱質可敵瑤琨堅傳聞書自太史籀比於大篆尤瑰妍
其辭典奧儷二雅彷彿吉日車攻篇周京遺製衆所信

疑義莫定文成宣紛綸雖滋翟鄭議審視終異秦斤權
下逮字文豈能爾薺堂所見母乃偏嗚呼神物不易覩
三代舊跡稀流傳亟咸告辭熊相詛裕陵寶惜今棄捐
比干銘折衛州壤穆滿書徙壇山巔會稽窆石字茫昧
岫嶁秘跡文糾纏掎摭非乏好奇士千搜萬索無真詮
詎若十鼓離復合陳倉入汴還留燕璫包席裏橐駝背
塵蒙露濯瓜牛涎置諸太學始皇慶于今又歷二百年
深檐五大密蓋護不受長雨闌風顛我來摩娑輒終日

證以郭薛施潘箋凝思斲桐來自蜀叩之定有聲淵淵
文殘非因硬黃搨劃缺反撼鈎金填長廊無人起題壁
回視落景棠梨懸

少年行

長安少年意氣豪雕鞍寶騎金錯刀呼盧百萬等土壤
報讎一死輕鴻毛自言生為游俠子願輸肝膽酬知己
此時未遇平原君且學鬪鷄都市裡朝遊紫陌黃金堤
暮宿瓊樓桃李蹊探丸直向杜陵北挾彈頻過渭水西

一聞邊警還投袂轉戰前收漠南地介子身封萬戶侯
嫖姚家賜千金第

瑣里行

海外大九州一稊一粟島嶼浮是何瑣里國治厯知春
秋髹槃驗一綫鍼將子午求曾未識中夏帆從何處收
虬鬚鵲眼巔其面海舶初來寄江甸巧將製器媚中涓
自鳴鐘獻黃金殿吾思厯象由羲和縱有歲差良不多
豈容小邦定正朔倒置列宿成愆訛古來明王異物恒

不貴遠人留之甚無謂況乎天官有禁祕不傳毋俾此
輩忝我靈臺篇

雪

夜來千里雪曉起徧長安轉覺西山近宜從上苑看河
冰難渡馬野艇盡投竿最苦東征士關門擊柝寒

經寧庶人廢苑和葉給諫韻

吳淞何知反劉安但自尊魚鹽時不利雞犬爾焉存俘
已儒臣獲軍猶鎮國屯白頭遺父老尚說獻王孫

瀛洲亭新池

奪玉燕山石疏泉太液流采桑傳自李鑿井舊聞劉

謂李

文正劉文安也

浴鳥牽萍起纖鱗撥荇游相看無限意落日且

淹留

杜門

杜門甘寂寞無事獨登臺白日旦復旦浮雲開未開幾
聞鳩化眼孰籍鳩為媒只合還山夢輕帆一舸回

同周公瑕屠緯真俞羨長石湖玩月分賦得天字

今夜清秋月江橋一串懸樹深潛滴露水濶不分天滿
載官厨酒聽彈商女絃薄寒風漸緊主客未迴船

初夏過沈純甫穆湖村舍

逐臣歸嶺外近住穆湖村油菜齊抽甲珠藤不露根漉
湯貓竹筍下酒鴨餛飩滿筐新詩卷曾無諫草存

新昌石佛寺

石佛何年寺空山麗相存一音不可說兩足此為尊雲
起長迷路厓傾自作門復輿下坡暝回首月明村

雨夜

黯黯浮雲色蕭蕭急雨聲人難今夜睡天慮此時傾
茅屋牀牀漏菱池曲曲平愁心如曷旦不避暗風鳴

葉進卿出都訪予里第話舊三日臨行景德寺餞

別
三首

自我辭京闕公今亦避賢一舟旋泛宅萬事且歸田
西日雲仍蔽東溟海未填無由慰朝野把酒強陶然
燒尾偕通籍揚眉共校文由來真臭味相逐比龍雲拙

免書鈎黨衰猶話典墳相留三日醉離袂忍輕分
景德前朝寺經過路舊諳到門三貝瑤負郭一龍潭別
思花重驛離筵酒半酣平泉新草木須滿道山南

金銘寺訪秋潭上人

不遠金銘寺支公舊法堂鷗夷范蠡宅程史岳珂坊過
雨花盈砌抽梢竹覆牆由來方外社主客意都忘

湖上

峰頭寶所瑤湖上水仙王芳草年年綠風荷岸岸香靱

鞦韆細雨對酒易斜陽不計重門遠瓜皮上小航
繇桐廬經釣臺下作

藥草仙人錄星文釣客槎祠開高下屋江溜淺深沙綠
樹縣蠻鳥丹崖躑躅花誰歌竹如意懷古一長嗟

萬壽寺

貝葉三車少華鐘萬石餘聲仍到長樂地合置精廬瀟
灑人王界莊嚴學士書秋來霜落後流響更何如

聞蟬

燕臺歇雨薦涼颼吹送蟬聲滿御墀清影不教塵外見
長吟先入禁中知上林氣暖枝堪託仙掌秋高露復滋
撫罷五絃聽漸遠空庭疎樹午陰垂

西山謁景皇帝陵

戾園悽斷白楊風黃瓦今看天壽同北狩豈無通問使
南城專賞奪門功若教守土盟城下安得蒙塵返域中
多少諫臣司耳目昌言翻賴校官忠

追復景皇帝謚號
由荆門州儒學訓

導高瑤上
疏言之

恭謁孝陵同葉進卿賦

夾道山松間石楠遙瞻暖翠鎖浮嵐靈龜玉殿十飛九

孝陵

開穴時中有玉龜十其九飛去一存享殿

馴鹿銀牌寸有三

鍾山鹿千百為羣有懸銀

十其

九飛去一存享殿

牌者高皇時所第少豐碑撰方練

陵無建文年碑

悔多姦黨示

畜牌約三寸

胡藍

胡惟庸藍玉之獄高皇暴其罪有昭示姦黨錄文皇帝後以目建文諸臣

五雲縱護昌

平嶺佳氣湏知兆自南

孝陵感革除事同葉進卿作

四年萬事革除休遜國遺蹤何處求事去金川門不閉

心驚玉殿火初收
空餘靈谷松千樹
誰見文孫土一丘
未必西南到天末
魂歸終傍孝陵遊

徐五修招遊九峰三泖之勝晚過斜塘賦此

月落風微何處鐘
斜塘岸岸柳惺忪
疎星數點布棊局
宿鳥一羣衝釣舸
潮水漸生黃歇浦
野花齊放陸機葦
故人擬贈丹砂訣
商榷栖山第幾重

天台道中

落月林梢一鵲飛
赤城霞已照征衣
水清幾曾鷺鴨鬧

屋小也有松筠圍白葛花香眠鹿起胡麻飯熟行人稀
當年劉阮本俗物到此何心苦憶歸

自北鴈蕩踰南鴈蕩觀龍湫瀑布作

靈域峒堯隱不知中歲七十二峰奇披衣正在烟深處
到面初無雨歇時謝客未曾經蠟屐貫休已後少題詩
洞天只恨流傳晚莫覩蟲書鳥篆碑

謁定陵有感述

乞歸自放潞河船息偃江湖二十年往事句臚成夢寐

重來弓劍莫攀緣要知孝為慈闈盡誰道恩從貴戚偏
猶記南宮封事入聽言終似轉圜然

自注國祚因請冊立東宮劾及鄭國

泰先帝不之罪終如所請

恭謁慶陵作

二首

講幄頻趨鶴籞深重來就日慘棠陰十年始受東朝冊
一月真傾下土心視旌盡收中使節披沙罷採升人金
最愁日歷書難既龍去烏號涕不禁

枚卜纔宣三殿麻深宮遽晏五雲車翠微色映長陵樹

金粟堆開景帝窪北去重關遮鳥道西來一水抱龍沙
白浮村下園官近未夏雕盤已薦瓜

頒歷恭紀

閭門開曉日玉律下雲邊一紀逢義馭千秋卜漢年靈
臺占氣早上苑得春偏瑞靄含蓂莢懽呼雜管絃三辰
傳夏令萬國戴堯天欲進昇平頌慚無白雪篇

太學釋奠同郭美命行分獻禮畢周覽橋門石鼓
歸途成二十韻

上丁遲日麗咸秩辟雍先釋奠周官禮安歌魯國絃質
明期敢後分獻典宜虔宿鳥初離樹殘星尚在天百夫
趨陸戟萬舞列宮懸次第陳犧象從容執豆籩班居元
老次位近素王偏十子升堂舊千秋配享焉循階登降
數薦帛節文全小大從于邁東西互折旋黃流纔灌地
未燎已生烟畢奏咸和曲徐收廣殿筵更衣辭鷺序散
胙得羊肩坦步橋門外偕行獵碣邊形模度科臼歲月
昧成宣已免風霜剥無愁鐘簴遷四詩雖絳漏終古自

流傳坐久趨松日歸來並杏韉協恭良不易同調最相
憐好琢燕山石題名廟學壩

西勾橋口占

東雉村邊水西溝橋下流濯纓人不至處處浴沙鷗

裂帛湖上作

水淨一匹練山圍六扇屏春風纔幾日藥甲已先青

即景

秋風靡靡吹舟入蘆花裏相呼隔岸人聲墮半江水

逢破瓢道人吳少君

山人愛一瓢時時負肩背
貽我巨勝花來自白羊隊

東魯道上作

汶水又一曲龜山知幾重
從今冰上渡應少赤狐蹤

東朝侍直

二首

殿庭香靄接雲平一道爐
函夾陛行肅肅講臣齊鵠立
金蓮影裡喚先生

東華疎雨淨雰埃
奪玉階平埽碧苔
猶恐侍臣侵履濕

宣從殿側左邊來

晚過天寧寺

郭外秋山百里晴日斜
深院晚涼生十三層瑤半扉影
一鳥不來風鐸鳴

題白雲觀

一言止殺古人難
多少逋臣藉爾安
辛苦捐軀文信國
得歸也擬著黃冠

夜泊淨業寺

僧樓佛火漾空潭
李廣橋低積水含
一夜朔風喧樹杪
蘄門飛雨遍城南

西湖上

芍藥闌邊花氣收
鷓鴣谷口斷雲浮
倦遊愛說江鄉事
先試西湖一葉舟

卧佛寺

人傳蘭若春三月
花比青彌陀院多
惆悵芳時來獨後
但聞風葉響杪羅

碧雲寺

銀榜高懸寶地賒遊人只愛寺前花不知賈舶徵求盡
舊鬼年年哭潞沙

秋入香山寺

山半松門度石梁流泉泱泱響僧廊置身著色屏風裡
梨葉新紅柿子黃

洪光寺

石門幾曲轉丹梯圓殿僧同怖鵲棲指點游人下山路

酒旗風颭夕陽西

夜宿鮑家寺

青豆房低結構牢長松靜夜卷秋濤
分明一枕谿亭雨睡起不知山月高

中峰晚望

中官丙舍即花宮松柏林前梵磬風
試上精廬高處望樓臺金碧夕陽中

摩訶庵觀杏花作

摩訶庵外袖吟鞭繁杏春開十里田曾與邨翁舊相識

看花不費酒家錢

吳巨手云元時杏花齊化門外最繁東岳廟石臺羣公賦詩張燕傳為盛

事郭囉洛易之詩云上東門外杏花開千樹紅雲遠石臺最憶奎章虞閣老白頭騎馬看花來至明城東花事衰郊西漸盛萬厯後摩訶庵杏花多至千株吾鄉朱太傅養淳詩云云承平之日翰苑風流後先一致也

祕魔厓

祕魔厓仄蘚紋斑千載盧師去不還遺有澄潭二龍子

日斜歸處雨連山

嘉禧寺

山牆圍作化人城
榆柳陰濃信客行
始信精廬風日好
秋深猶綠牡丹坪

江上夜泊

江上扁舟一葉輕
夜深燈火滅還明
枕函未作寒山夢
卧聽潮聲帶雨聲

梅家蕩櫂歌

梅家蕩口蜆子黃
瓜皮冒船七尺長
剪取東園白頭韭
蛤蜊風味勝橫塘

李廷機 一首

廷機字爾張晉江人萬厯癸未賜進士第二授
編修歷官太子太保禮部尚書文淵閣大學士
贈少保謚文節有集

靜志居詩話文節清畏人知奈為黨論所攻攢
譏疎誚而君子之守確然生時以帖括名詩非
專務聞蟬一
絕正自翩翩

雨霽聞蟬

五雲初霽曙光流垂柳千條蔭御溝兩岸新蟬啼不住

隔林遙送漢宮秋

劉應秋 一首

應秋字士和吉水人萬歷癸未賜進士第三授
編修遷南京國子司業尋以右春坊右中允管
司業事充日講官升洗馬歷諭德庶子以國子
監祭酒致仕贈禮部侍郎謚文節有劉大司成

集

鄒爾瞻云公詩文雍
容舒徐出入韓歐間

詩話文節儒臣非有言責而上書請東朝冠昏
劾首輔彈中樞可謂古之遺直己其言有云近

代論相多取諸詞林詞林雍容雅度一切雖齷
猥瑣曾不闕其慮博而習於故靜而徹於幾能
以事外之身策事成敗則惟詞林勝矣寥寥
數言其占地步不淺詩非所務無戾雅音

送林仰晉謫茶陵

夕郎抗疏出金扉萬里衡陽一鴈飛世路何年遷客少
聖朝今日諫書稀黃陵雨暗連青草嶽麓雲深濕翠微
千載汨羅人不見寂寥心事更誰依

葉向高四首

向高字進卿福清人萬厯癸未進士選庶吉士

授編修歷官坊局南吏部侍郎召為禮部尚書
入直東閣以少傳予告再召為少師兼太子太
師吏部尚書中極殿大學士卒贈太師諡文忠
有蒼霞草

詩話東林諸子奉福清為倫魁沙汰江河和調
水火海內服其公忠歸田之日蘊藉風流銜左
相之窪尊賭東山之基墅詩品
在山林臺閣之間諸體皆具

渡江即事

無嗟風土異已自邈關河村舍人烟少旗亭酒幔多春

寒芳草歇天闊斷鴻過長路方茲始微名奈若何

送林客部南歸

幾年共逐帝京塵此日那堪別恨新
畫省風流傳諫草黃扉事業媿絲綸
故園載酒宜清晝客路聽鶯屬暮春
君到里門應北望長安猶有未歸人

出關別江仲魚

心知惆悵對離觴一望郵亭十里長
自與江郎黯然別馬頭春草是他鄉

題趙子昂明妃出塞圖

三千粉黛泣長門
嫁得單于亦主恩
貌取紅顏無限恨
集賢學士宋王孫

周應賓

一首

應賓字嘉甫鄞縣人萬歷癸未進士改庶吉士
除編修累官禮部尚書掌詹事加太子太保回
籍卒謚文穆有月湖草

去婦詞

故人昨日新
新人明日故
同是機中人
何必問縑素

郭正域 三首

正域字美命江夏人萬厯癸未進士改庶吉士
授編修歷中允諭德庶子遷南京國子監祭酒
入為詹事掌翰林院升禮部右侍郎卒諡文毅
有黃離草

詩話文毅坐妖書繫獄九死不悔可謂骨鯁之
臣其論樂府云今人全用擬議而無變化令人
讀之如挾陳人口中珠殆為于鱗輩發也又言
文章不可學一家詩必自三百篇漢魏六朝下

至唐人皆在胷中筆底乃稱
作家蓋有志而未造其詣者

長安道

長安道春無花夏無草何不歸來山中好

遣祀景陵恭紀

宣皇陵廟天山裏王氣蔥蔥鎖帝梧只見丹臺餘寶鼎
不聞銀海繞金鳬千官露舄朝珠隴五夜雲車下紫都

記得當年巡幸日道傍駐輦問農夫

宣德十年事

廬山五老峰

湖中五老峰去天不盈尺澗底白雲生五老頭俱白

岳元聲一首

元聲字之初嘉興人萬歷癸未進士除旌德知
縣改大名府教授轉國子監博士進監丞升工
部主事歷員外郎中疏論首輔奪情落職起南
京光祿少卿轉太常少卿再轉南太僕卿遷南
兵部右侍郎進左侍郎有潛初子集

詩話侍郎立朝侃侃不阿里居有不平事弗避
嫌怨力排衆議以歸於正所謂鄉先生沒而可

祭於社者集中韻語罕存寄弟一律曾以題扇者蓋本岑嘉州嬌歌急管雜清絲之作後驂鸞錄登公集均失載殆不知者嫌其失粘而刪去之也

寄仲弟慶遠守爾律

梅花花信春應早楊柳柳州種定曾天邊白雨愁卑濕
瘴後黃茅苦鬱蒸秋風小鳥供行饌暗壑修蛇掛古藤
驂鸞續錄聞初就可以吳船范致能

申用懋一首

用懋字敬中長洲人萬厯癸未進士除刑部主

事改補兵部歷員外郎中遷太僕少卿再遷南
京太常卿以右副都御史巡撫順天進尚書

薊門歸興

山河百二擁宸居亭障三千衛直廬要害直須勤版築
軍屯好在理耰耞時議開復東巡直據元菟塞北望頻

傳白羽書自媿酬恩猶未得空留車馬賦歸與

姜應麟一首

應麟字子文慈谿人萬歷癸未進士改庶吉士

授戶科給事中以建言謫廣昌典史遷餘干知
縣補龍溪起太僕少卿贈太常卿

秋懷

廿年投老此山丘倚杖閒看水獨流萬樹秋聲連斷峽
一天涼雨過層樓因題楓葉開詩卷為訪蘆花上釣舟
日靜衡門無剝啄忘機惟得伴沙鷗

鄒德溥一首

德溥字汝光安福人萬厯癸未進士改庶吉士

授編修歷中允洗馬卒於家以講官諭祭有雪
山草圃畝吟

雨霽聞蟬

西山一望隔簾櫳柳暗花明御苑東
斷續蟬聲聽不盡
夕陽人立小亭中

王萱一首

萱字季孺慈谿人萬歷癸未進士改庶吉士授
編修

題青牛出關圖

柱下藏名久知希未足論辭榮翻守辱體物必歸根一
望真人氣應占大道存若為關令尹乞得五千言

徐應聘一首

應聘字伯衡崑山人萬厯癸未進士改庶吉士
授檢討歷太僕少卿

瀛洲亭對雨

祕閣清宵近蘭泉曲沼開宿烟生暮雨新水長秋苔地

向蓬萊接波分太液來憑軒多爽氣疑在白雲隈

于若瀛

九首

若瀛字子步濟寧衛人萬厯癸未進士除戶部

主事歷官右僉都御史巡撫陝西贈右副都御

史有弗告堂集

葉進卿云文若詩冷然超詣不襲世人片語而情景婉至無跡

象可尋王則之云文若近體清曠秀倩出入開元大厯之間焦弱侯云念東詩不激而高

不刻而工雋永藏於溫醇纖穠寓之雅淡所稱治世之音非邪

詩話念東詩格未超

然不屑作輟熟語

宿唐洞寺

野寺大道旁，短垣倚雲嶠。
舍策叩禪關，平蕪恣延眺。
暝色還荒徑，明滅寒原燒。
篝燈坐幽室，皎月來相照。
未稅塵鞅勞，已窺靜者妙。
夜半風鳴條，不減蘇門嘯。

晚投清江浦

淮水吞江浦，孤帆晚復開。
樹移沙岸轉，波逆海潮迴。
人語迎邨雜，漁燈拂櫂來。
繫舟猶未穩，寒漏已頻催。

高郵湖

高郵初挂席波起蕩湖邨遠水浮天白孤城過雨昏柳
條依岸斷鷗鳥向人翻破屋稀烟火滔滔銷客魂

再過清涼寺

再入清涼寺高臺覽舊都金陵猶王氣石壁自雄圖密
樹依城合澄江入雨無六朝人事改瞻眺獨踟躕

雨宿潼關

明燈虛館淒清夜細雨蕭蕭亂客腸秋入關門悲鼓角
年來驛路老星霜家臨濟水菰蘆白壠接南山黍穀黃

千里故園愁阻絕夢還京國亦他鄉

時寄家
京邸

寄隱閣春興

小閣逶迤近水渠蕭條不讓野人居
惟將藥裏供多病不為花飛憶敝廬
嬾散江邊清夢穩交游天上故人疎
亦知衰晚甘淪棄世事浮雲任卷舒

舟中雜興

兩岸山相似舟移曲不妨回看京口盡
落照下丹陽

清泉寺

滿谷西風椒葉稀
穿林片片凍雲飛
荒原車馬應無數
閒殺山僧坐翠微

金陵春

晴雲曉壓石城孤
江樹江烟淡欲無
南雪未消靈谷寺
東風先綠莫愁湖

徐學聚一首

學聚字敬輿蘭谿人
萬厯癸未進士
除浮梁知縣
調吉水擢禮科給事中
出為山東提學副使

歷福建布政使尋以右僉都御史巡撫福建贈

副都御史

阮霞嶼云敬輿詩文自出機軸為藝林推尚

詩話弘正以前實錄儲祕館薦紳罕得寓目此祝希哲九朝野記徐昌穀剪勝紀聞等書多齊東野人之語自華亭在政府抄有副本弇州見之故史料始得其實敬輿國朝典彙一編亦從實錄采摭者也詩亦尚聲格惜所傳不多

夜宿日觀峰禪房

岱宗面面削芙蓉時有卿雲出漢封
杖屨中天千象緯
風烟下界起蛟龍
河流舊繞滄溟遠
練影斜懸紫翠重

夜半石牀天籟發夢中錯認景陽鐘

來三聘 二首

三聘字任卿蕭山人萬歷癸未進士除黃梅知縣調合肥入為兵部主事歷官江西右布政使

有祠部南舟豫章蜀游東游南華等稿

于念東云任卿

詩格律嚴整而一種恬淡之氣不減陶家風致

豫章夜雨

一月餘寒在高齋聽雨眠夜愁牽往事春夢入芳年才

拙官何補家貧俸未捐遙憐鏡湖水重負杏花天

解悶

春風吹暖百花新
院麴香浮竹葉春
今日酒拚今日醉
一年花老一年人
浩歌聊借鶯為管
醉卧何妨草作茵
高興未闌天欲暮
攜壺帶月問西鄰

何出光一首

出光字兆文扶溝人萬歷癸未進士除曲沃知
縣擢貴州道御史外轉太原知府京察謫寧州

判官遷知樂陵完縣

次獲鹿簡井陘顧兵憲

孤城萬古控幽燕
喬木殘碑不記年
路入井陘分趙晉
天開畿甸擁山川
土門故傍封龍窟
石邑猶存白鹿泉
西北和戎非上策
使君此地好籌邊

王時濟一首

時濟字道甫
稷山人
萬歷癸未進士
除戶部主事
歷郎中
終衛輝知府

登高丘

清林人跡稀我來何所翫坐看嶺上雲天風莫吹斷

虞淳熙一首

淳熙字澹然錢塘人萬厯癸未進士授兵部職
方主事遷主客員外郎改稽勲郎罷去有德園

集

景泰窪

合沓衆山轉鴻溝界危岡貞松心不移偃蓋覆神堂欲

蛻龍為魚千古以慨慷土木骨縱橫魂來關塞長君王
奠鰲足太史策苞桑宗廟救淪喪朱火寒有光迎駕誼
何篤覆轍戒難忘豈無延陵心重為亡國傷宮門一以
奪羨門竟迷方碧瓦易黃屋蓬顙西山傍杜宇啼舊痕
織鳥集野棠坤維辛勿絕一窪得新藏靈表扶九宮何
必厰陰房碧血障胡塵芊芊白草芳高睇歌大招涕泗
灑衣裳

朱長春

十二首

長春字太復烏程人萬厯癸未進士知尉城常
熟陽信三縣入為刑部主事削籍有太復文集

詩話太復頗類孫太初其宰陽信狀海濱風土
如海時雲連合春寒雨近城沙田惟種黍鹵井
不通泉過而如雷雪無風自落沙白沙風裡下
黃日霧中生薄祿供囊藥齋廚費水錢頗盡其
致他如折藕露華白采菱秋水香悠然西湖曲
生對南屏山高樹晨光動空山衆響聞夢花來
社燕小雨破春泥落日餘高柳空江起暮鐘酒
船晴盡出賽鼓暝猶聞纜外春沙沒燈前獨樹
斜蒼藤緣戶結翠鳥落階飛驛火依沙出春星
傍浦懸孤飛江上鳥半減雨中山皆秀句也晚
學修真鍊形蓋
不得志而有託

秋日詠懷

白雲自西來經風忽從東鳴鳩化蒼鷹世變安有窮昔
種蕙蘭花將以遺所同一人懷一心兩心故難終鶻鷃
熙春陽蟋蟀吟秋風萬類各有時吾其守愚庸

出三江口南下

日出漾清渚三江帆正開白憐茅步

山名

過青見芡蘿

邨名

來海氣如秋雨春潮似薄雷空餘好山水已是越中回

赴歷下塗中作

白日散原霧秋光照井閭海田秋歲早寒木落風初天
地身長滯風塵役未除病夫心尚壯不敢憶鱸魚

舜廟

玉座垂衣古秋風謁帝祠蒼梧狩不及黃屋儼如斯石
鎖青苔井松巢白鶴枝歷山千古淚泉響至今悲

發縣次日過鹽山

宿雪古原清川陵動客情啼鳥非昨日嘶馬復空城世
路勞為役生涯恥薄名十年一墨綬暫解也身輕

六月復病寄弟

白霧連春瘴長風起夏寒三年幾死客每病欲休官短
髮催初服空牀媿素餐行藏日夜淚謀及室人難

再贈伯念

茂陵多病日詩句轉清新麗藻看時輩窮愁近古人萼
絲吳苑暮蘭草楚江春珍重凌雲賦君王問侍臣

對月

千乘城西百尺臺九河沙曲斷潮迴邊隅落日風常慘

海口初春霧未開
南國漸遙空夢斷
北人雖近少書來
自然對月淚堪下
何況啼烏聲更催

對雪

狂風吹雪海荒荒
遊子將歸尚卧床
二月天邊未花草
三年寒色故衣裳
即看慘澹迷虛牖
轉復霏微壓短牆
寄語東皇休更妒
暫開春暖放還鄉

移家

翠竹新栽映白沙
碧湖深處此吾家
欲逃城市移居遠

頗有山林發興餘
野鳥乍過窺几席
鄰人相見饋魚鰕
蓬蒿不比揚雄宅
翻喜門無載酒車

端午

菖蒲艾葉泛杯香
午酌曾軒對雨涼
野水茅籬三徑竹
貧家風俗五絲囊
轉因卧病朝參嬾
不是逃名隱興長
長憶九華明月扇
漢廷此日賜諸郎

入山

山深石色古
洞草無行迹
何處有人家
朝烟澗西白

茅國縉一首

國縉字薦卿歸安人萬厯癸未進士除章丘知縣入為廣東道御史謫知浙川遷南工部主事歷郎中有菽園詩草

過白門酬拙之贈別

孤帆渺渺指江汀飛盡楊花柳尚青此去不堪頻北望
愁邊風雨滿新亭

莊履朋一首

履朋字中益晉江人萬厯癸未進士官戶部主事

別林尉

桑梓勤吾念憑君破寂寥
自今花下吏日折道傍腰
象郡風烟隔龍城瘴氣消
行春聊佐令亦足採歌謠

張壽朋 三首

壽朋字冲猷號西江南城人萬厯癸未進士除刑部主事謫泰安州同知終廬州府通判有深

息窩集

狂歌

夷門老侯生刎頸送公子此義豈不高感人安用死毛
薛亦風流諷言何婉美信陵賴相成歸國見終始身隱
世隨棄無復關人理悲哉豪俠流大道所不齒

西湖憩胡氏亭

中庭遙相望斗室更臨水云有賣藥人十年身已死柴
扉苦長扃我到為之啟鳥跡半幽牕蛛絲橫斷几花殘

沒階前竹亂生屋裏邨婦持帚來埽除亦堪喜破簷補
荻簾新火燒楓子可以坐老狂開尊炙枯鯉夕陽何處
歸大醉且閒止

翠屏房

江漁釣罷無市野寺殘僧似邨鉏圃湏留行路愛山莫
掩柴門

湯顯祖九首

顯祖字義仍臨川人萬厯癸未進士除南太常

博士遷南禮部主事謫徐聞典史量移知遂昌
縣有玉茗堂集

詩話義仍填詞妙絕一時語雖斬新源實出於
關馬鄭白其牡丹亭曲本尤極情摯人或勸之
講學笑答曰諸公所講者性僕所言者情也世
或相傳云刺墨陽子而作然太倉相君實先令
家樂演之且云吾老年人近頗為此曲惆悵假
令人言可信相君雖盛德有容必不反演之於
家也當日宴江女子俞二孃酷嗜其詞斷腸而
死故義仍作詩哀之云畫燭搖金閣真珠泣繡
牕如何傷此曲偏只在婁江又七夕答友詩云
玉茗堂開春翠屏新詞傳唱牡丹亭傷心拍遍
無人會自掐檀痕教小伶其後又續成紫簫殘
本身後為仲子聞遠焚棄詩終牽率非其所長

宿浴日亭因出小浪望海

為郎傍星紀江湖常久居倏忽過南海片帆挂扶胥隱
隱岸門青杳杳天池虛培塿澹凌歷氣脈流紆徐潮迴
小洲渚龍鱗勒溝渠於中藏小舟其外懸日車雲影蒼
梧來咸池相卷舒孟冬猶星河淡月沾人裾陰陽盪揮
霍精色隱踟躕濯足章丘餘沐髮扶桑初濤輝臨侑盤
若木鮮芙蕖西顧連崦嵫東眺極扶餘小浪亦莞爾大
波始愁予嶼舶自吞吐樓櫓成烟墟飛金出熒火明珠

落鯨魚吾生非賈胡萬里握靈精
晝靄羅浮外傳聞仙所廬玉樹如
冬青瑤芝若栟櫚陽鳥不日浴晝
夜更扶輿丹穴亦不灾好風常相
噓白水月之津一飲饑渴除徐問
汝仙尉去此將焉如

達奚司空立南海王廟門外

司空暹羅人面手黑如漆華風一
來覲登觀稍游逸戲向扶胥口樹
兩波羅蜜欲表身後奇願此得成
實樹畢顧歸舟冥然忽相失虎門
亦不遠決撇去何疾身家隔

胡漢孤生長此畢猶復盼舟影左手翳西日嗔勾帶中
裂胡隴氣噴溢立死不甯僵目如望家室塑手一何似
光景時時出墟人遞香火陰風吹萃律上有南海王長
此波臣秩幽情自相附遊魂知幾驛至今波羅樹依依
兩蒙密波聲林影外簷廊暝蕭瑟

麗水風雨下船棘口有懷

石城雙水門落日遠江介春潮風雨飛暮寒洲渚帶流
雲蒼翠裡緒風簫鼓外分披悟曾裂合沓迷新屈宿霧

緬餘丘生洲隱遙派地脈有虧成物色故明昧曲折神
易傷幽清境難會江花莞流放岸草悽行邁不見林中
人自撫孤琴對

送楊安入太原軍

星使三河外春王二月初風雲臨上黨花鳥入昭餘關
近笳聲急川遙騎影虛世途君自見長嘯欲何如

偶成

鴈影金河盡梅花玉管催江南望春色獨上鳳皇臺

浪石灘

雨濕湏陽暮風鳴浪石寒
鷗鷺飛不起橫過釣絲灘
恩平中火

海氣層雲盡山烟遠燒浮
孤臣隨早晚一飯是恩州
覲回宿龍潭

是歲春連雪烟花思不堪
雨中雙燕子今夕是江南
臨江樓聞越舸且別悵然

亂帆秋影半江樓
燕語淪涼傍客舟
便去揚州且明日

故鄉今夜有人留

姚思仁一首

思仁字善長秀水人萬厯癸未進士除行人選
江西道御史巡按山東河南升通政司參議大
理少卿應天府尹入為通政使轉工部右侍郎
歷尚書太子太傅有菴竹堂遺藁

詩話肅皇帝信薊州人李昇嵩縣人刁騰之言
分遣中貴崔閔主事沈應乾千戶全爵李鉉至
其地相視銀礦是時遼東衛軍姜賢亦奏開蓋
州歸州之礦遂以賢為礦長至萬厯間陳開礦

之利者紛紛於是中貴四出海內騷然姚公為
巡按仿鄭俠流民圖擬開采圖說進呈力請罷
役不聽既而開礦者爭相仇殺羣盜竄起畿甸
則齊本數李庸史籍周言張世才石賓河南則
張住朱世安趙仲保蘭一枝王西安山西則張
守清郭貴三張盡忠許廷珍寧夏則楊戩本欲
利國而國幾危矣公嘗注律以律文簡而易晦
乃用小字釋其下本朝頒行大清律實依公
所注本也公居鄉孳孳為善年
九十一考終余幼時猶及見之

嘉祥曾子祠

新祠結構澗之阿問俗年來向此過大勇萬人吾往矣
傳心一貫道靡他徂迴殘夢遺琴朱瓜種先疇舊跡訛

自是聖朝崇典祀每聞金石奏安歌

盛萬年一首

萬年字恭伯秀水人萬歷癸未進士除刑部主
事歷工部郎中出為福建按察副使歷廣東貴
州江西按察使遷雲南布政使未任卒有拙政

編附詩

詩話盛公浮湛藩屏數歷有年當其司臬羊城
值倭人入寇躬擐甲胄乘城擊破之於錦囊所
嘗以一人攝五監司事案無留牘其還家詩云
三黜已甘投嶺外一帆今喜到江鄉所居梅湖

饒有魚稻之利築場納稼專以
寶書訓子孫先疇至今未改云

右江謠

昭江濫濫連邕管千厓赭碧清霜滿竹雞格格啼榕林
修蛇毒霧愁浸淫鳥言卉服繡項渠荒茅叢箐山頭居
時平莫負篋笈弩夜雨叢祠賽銅鼓

殷都一首

都字無美蘇州嘉定人萬厯癸未進士除廬陵
知州入為兵部員外歷郎中調南刑部京察去

官

離資園

蘭生在深谷寧畏惡草滋受性偶不同托根從所宜夙
齡負耿介中路遭嶮巖棄置纓與綏歸來尋故蹊南山
荒豆田東陵沒瓜畦躑躅不自得為園且栖遲上有護
草堂下有春草池光風旦夕至引觴以為怡蘭者自為
蘭資者自為資達觀詎離俗全生甘息機寄言謝人徒
殊調勿見疑


欽定四庫全書


卷五十九

詩話無美藉甚詩名而遺集罕傳離資園一篇
為王元美作也園在州治鸚哥橋東有山有池
亭曰壺隱曰啼髮軒曰鸚適室曰碧浪曰
小憩後池曰芙蓉沼元美嘗自為作記

明詩綜卷五十九

謹案第十六頁後三行郭囉洛舊作葛邏祿今改





總校官庶吉士 臣張能照

校對官庶吉士 臣嚴福

謄錄監生 臣蔣大鎔